

南齊



志第八

南齊書十六

臣蕭子顯撰

百官

建官設職興自炎昊方乎隆周之冊表乎盛漢之書存攷洄沿備於歷代先賢往學以之雕篆者衆矣若夫胡廣舊儀事惟簡撮應劭官典始無遺恨王朗奏議屬霸國之初基陳矯增曹由軍事而補闕今則有魏氏官儀魚豢中外官也山濤以意辯人不缺音人荀勗欲去事煩唯論

并省定制成文本之晉令後代承業案爲前准
肇域官品區別階資蔚宗選簿梗槩欽明階次
詳悉虞通劉寅因荀氏之作矯舊增新今古相
校齊受宋禪事遵常典既有司存無所偏廢其
餘散在史注多已筌拾覽者易知不重述也
諸臺
府郎令史職吏以下具見
長水校尉王珪之職儀

國相

蕭曹以來爲人臣極位宋孝建用南
譙王義宣至齊不用人以爲贈不列

官

太宰

宋大明用江夏王義恭以後無人齊
以爲贈

太傅

太師太保太傅周舊官漢末董卓爲
太師晉惠帝初衛瓘爲太保自後無
太師而太保爲贈齊唯置太傅

大司馬

萬曆十七年

大將軍

宋元嘉用彭城王義康後無人齊以爲贈

太尉

司徒

司空

三公舊爲通官司徒府領天下州郡名數戶口簿籍雖無常置左右長史左西掾屬主簿祭酒令史以下晉世

特進

位從公

王導爲司徒右長史于寶撰立官府職儀已具

諸開府儀同三司

驃騎將軍

車騎將軍

衛將軍

鎮軍將軍

中軍將軍

撫軍將軍

四征將軍

東西南北

四鎮將軍

凡諸將軍加大字位從公開府儀同如公凡公督府置佐長史司馬各一人諮議叅軍二人諸曹有錄事記室戶曹倉曹中直兵外兵騎兵長流賊曹城局法曹田曹水曹鎧曹集曹右戶十八曹局

曹以上署正參軍法曹以下署行參軍各一人其行參軍無署者為長兼負其府佐史則從事中郎二人倉曹掾戶曹屬東西閣祭酒各一人主簿舍人御屬二人加崇者則左右長史四人中郎掾屬竝增數其未及開府則置府亦有佐史其數有減小府無長流置禁防參軍

四安將軍

四平將軍

左右前後將軍

征虜將軍

四中郎將

晉世荀羨王胡之竝居此官宋齊以來唯處諸王素族無爲者

冠軍將軍

輔國將軍

寧朔將軍

寧遠將軍

龍驤將軍

凡諸小號亦有置府者

太常

府置丞一人五官功曹主簿九府九

史皆然領官如左

博士謂之太學博士

國子祭酒一人博士二人助教十人

建元四年有司奏置國學祭酒准諸曹尚書博士准中書郎助教淮南臺

御史選經學爲先若其人難備給事
中以還明經者以本位領其下典學
二人三品准太常主簿戶曹儀曹各
二人五品白簿治禮吏八人六品保
學醫二人威儀二人其夏國諱廢學
有司奏省助教以下永明三年立學
尚書令王儉領祭酒八年國子博士
何胤單爲祭酒疑所服陸澄等皆不
能據遂以玄服臨試月餘日博議定

戊辰詔進梁公爵爲梁王增封十郡三月乙未
皇太后令給梁國錢五百萬布五千匹絹千匹
辛丑鄱陽王寶寅奔虜邵陵王寶攸晉熙王寶
嵩桂陽王寶貞伏誅甲午命梁王冕十有二旒
建天子旌旗出警入蹕乘金根駕六馬備五時
副車置旄頭雲罕樂舞八佾設鍾簋宮懸王子
王女爵命一如舊儀庚戌以冠軍長史蕭秀爲
南徐州刺史新除中領軍蔡道恭爲司州刺史
車駕東歸至姑孰丙辰禪位梁王丁巳廬陵王

寶源薨夏四月辛酉禪詔至皇太后遜外宮丁卯梁王奉帝爲巴陵王宮于姑孰行齊正朔一如故事戊辰薨年十五追尊爲齊和帝葬恭安陵
史臣曰夏以桀亡殷隨紂滅郊天改朔理無延世而皇符所集重興西楚神器暨來雖有冥數徽名人號斯爲幸矣

贊曰和帝晚隆掃難清宮達機覩運高頌永終
本紀第八
南齊書八

乃服朱衣

總明觀祭酒一人

右太始六年以國學廢初置總明觀
玄儒文史四科科置學士各十人正
令史一人書令史二人幹一人門吏
一人典觀吏二人建元中掌治五禮
永明三年國學建省

太廟令一人丞一人

明堂令一人丞一人

太祝令一人丞一人

太史令一人丞一人

廩犧令一人丞一人

置令丞以下皆有職史

太樂令一人丞一人

諸陵令

永明末置用二品三品勳置主簿戶曹

各一人六品保與

光祿勳

府置丞一人領官如左

左右光祿大夫

位從公開府置佐史如公

光祿大夫

皆銀章青綬詔加金章紫綬者為金紫

光祿大夫樂安任遐為光祿就王晏乞

一片金晏乃啓轉為金紫不行

太中大夫

中散大夫

諸大夫官皆處舊齒老年重者加親信
二十人

衛尉

府置丞一人掌宮城管籥張衡西京賦
曰衛尉八屯警夜巡晝宮城諸却敵樓
上本施鼓持夜者以應更唱太祖以鼓
多驚眠改以鐵磬云

廷尉

府置丞一人正一人監一人評一人律

博士一人

大司農

府置丞一人領官如左

太倉令一人丞一人

導官令一人丞一人

藉田令一人丞一人

少府

府置丞一人領官如左

左右尚方令各一人丞一人

鍛署丞一人

永明三年省
四年復置

御府令一人丞一人

東冶令一人丞一人

南冶令一人丞一人

平准令一人丞一人

上林令一人丞一人

亦屬尚書
殿中曹

將作大匠

太僕

大鴻臚

三卿不常置將作掌宮廟土木太僕

掌郊禮執轡鴻臚掌導護贊拜有事

權置兼官畢乃省

乘黃令一人

掌五輅安車大行凶器輜輅車

客館令

掌四方賓客

宣德衛尉少府太僕

鬱林王立文安太后即尊號以宮名

置之

大長秋

鬱林立皇后置

錄尚書

尚書令

摠領尚書臺二十曹爲內臺主行遇諸王以下皆禁駐左右僕射分道無令左僕射爲臺主與令同

左僕射

領殿中主客二曹事諸曹郊廟園陵車駕行幸朝儀臺內非違文官舉補滿叙疾假事其諸吉慶瑞應衆賀災異賊發衆變臨軒崇拜改號格制莅官銓選凡諸除署功論封爵貶黜八議疑讞通關案則左僕射主右僕射次經維是黃案左僕射右僕射署朱符見字經都丞竟右僕射橫畫成目左僕射畫令畫右官闕則以次并畫

若無左右則直置僕射在其中間揔

左右事

吏部尚書

領吏部刪定三公比部四曹

度支尚書

領度支金部倉部起部四曹

左民尚書

領左民駕部二曹

都官尚書

領都官水部庫部功論四曹

五兵尚書

領中兵外兵二曹

祠部尚書

右僕射通職不俱置

起部尚書

興立宮廟權置事畢省

左丞一人

掌宗廟郊祠吉慶瑞應災異立作格

制諸案彈選用除置吏補滿除遣注

職

右丞一人

掌兵士百工補役死叛考代年老疾
病解遣其內外諸庫藏穀帛刑臯創
業諍訟田地船乘稟拘兵工死叛考
剔討補差分百役兵器諸營署人領
州郡租布人民戶移徙州郡縣併帖
城邑民戶割屬刺史二千石令長尉

被收及免贈文武諸犯削官事白案
右丞上署左丞次署黃案左丞上署
諸立格制及詳讞大事宗廟朝廷儀
體左丞上署右丞次署自令僕以下
五尚書八座二十曹各置郎中令史
以下又置都令史分鎮之僕射掌朝
軌尚書掌讞奏都丞任碎在彈違諸
曹緣常及外詳讞事應須命議相值
者皆郎先立意應奏黃案及關事以

立意官為議主凡辭訴有漫命者曹
掾諮如舊若命有諮則以立意者為
議主

武庫令一人

屬庫部

車將令一人丞一人

屬駕部

公車令一人

大官令一人丞一人

大醫令一人丞一人

內外殿中監各一人

內外驛騶廐丞各一人

材官將軍一人司馬一人

屬起部亦屬領軍

侍中祭酒

高功者稱之

侍中

漢世為親近之職魏晉選用稍增華
重而大意不異宋文帝元嘉中王華

王曇首殷景仁等並為侍中情在親
密與帝接膝共語貂拂帝手拔貂置
案上語畢復手挿之孝武時侍中何
偃南郊陪乘鑿輅過白門闕偃將匍
帝乃接之曰朕乃陪卿齊世朝會多
以美姿容者兼官永元三年東昏南
郊不欲親朝士以主璽陪乘前代未
嘗有也侍中呼為門下亦置令史領
官如左

給事黃門侍郎

亦管知詔令世呼為小門下

散騎常侍通直散騎常侍負外散騎侍郎

舊與侍中通官其通直負外用衰老

人士故其官漸替宋大明雖華選比

侍中而人情久習終不見重尋復如

初

散騎侍郎通直散騎侍郎負外散騎侍郎

給事中

奉朝請

駙馬都尉

集書省職置正書令史朝散用衣冠之餘人數猥積永明中奉朝請至六百餘人

中書監一人令一人侍郎四人通事舍人無負

中書省職置主書令史正書以下

祕書監一人丞一人郎著作佐郎

晉祕書閣有令史掌衆書見晉令

御史中丞一人

亦置令史正書及弟子皆典教書畫

晉江左中丞司隸分督百僚傳咸所

云行馬內外是也今中丞則職無不

察專道而行騶輻禁呵加以聲色武

將相逢輒致侵犯若有鹵簿至相毆

擊宋孝建二年制中丞與尚書令分

道雖丞郎下朝相值亦得斷之餘內

外衆官皆受停駐

治書侍御史二人

侍御史十人

蘭臺置諸曹內外督令以下

謁者僕射一人

謁者十人

謁者臺掌朝覲賓饗

領軍將軍中領軍

護軍將軍中護軍

凡為中小輕同一官也諸為將軍官

皆敬領護諸王為將軍道相逢則領

護讓道置長史司馬五官功曹主簿

左右二衛將軍

驍騎將軍

游擊將軍

晉世以來謂領護至驍游為六軍二

衛置司馬次官功曹主簿以下

左右二中郎將

前軍將軍後軍將軍左軍將軍右軍將軍號四

軍

屯騎步兵射聲越騎長水五校尉

虎賁中郎將

冗從僕射

羽林監

積射將軍

彊弩將軍

殿中將軍負外殿中將軍

殿中司馬督

武衛將軍

武騎常侍

自二衛四軍五校已下謂之西省而散騎為東省

丹陽尹

位次九卿下

太子太傅

少傅

府置丞功曹五官主簿

萬曆十七年刊

南齊志卷八

七

太子詹事

府置丞一人以下

太子率更令

太子家令

置丞

太子僕

太子門大夫

太子中庶子

太子中舍人

太子洗馬

太子舍人

太子左右衛率各一

太子翊軍步兵屯騎三校尉

太子旅賁中郎將一人

太子左右積弩將軍

太子殿中將軍
外殿中將軍

太子倉官令

太子常從虎賁督

右東宮職僚

州牧刺史

魏晉世州牧隆重刺史任重者為使
持節都督輕者為持節督起漢順帝
時御史中丞馮赦討九江賊督揚徐
二州軍事而何徐宋志云起魏武遣
諸州將督軍王珪之職儀云起光武
並非也晉太康中都督知軍事刺史
治民各用人惠帝末乃并任非要州

則單為刺史州置別駕治中議曹文
學祭酒諸曹部從事史

護南蠻校尉

府置佐史隸荊州晉宋末省建元元
年復置三年省延興元年置建武省

護三巴校尉

宋置建元二年改為刺史

寧蠻校尉

府亦置佐史隸雍州

平蠻校尉

永明三年置隸益州

鎮蠻校尉

隸寧州

護西戎校尉

護羌校尉

右四校尉亦置四夷

平越中郎將

府置佐史隸廣州

郡太守內史

縣令相

郡縣為國者為內史相

鎮蠻護軍

安遠護軍

晉世雜號多為郡領之

諸王師友文學各一人

國官郎中令中尉大農為三卿左右常侍侍郎

上軍中軍下軍三軍典書典祠學官典衛四令

食官廐牧長謁者以下公侯置郎中令一卿
贊曰百司分置惟皇命職雲師鳥紀各有其式

志第八

南齊書十六

志第九

南齊書十七

臣蕭子顯撰

輿服

昔三皇乘祗車出谷口夏氏以奚仲爲車正殷
有瑞車山車乘鈞是也周禮匠人爲輿以象天
地漢武天漢四年朝諸侯甘泉宮定輿服制班
于天下光武建武十三年得公孫述葆車輿輦
始具蔡邕創立此志馬彪勒成漢典晉摯虞治
禮亦議五輅制度江左之始車服多闕但有金

戎省充庭之儀太興中太子臨學無高蓋車元
 帝詔乘安車元明時屬車唯九乘永和石虎
 死後舊工人奔叛歸國稍造車輿太元中苻堅
 敗後又得偽車輦於是屬車增為十二乘義熙
 中宋武平關洛得姚興偽車輦宋大明改脩輦
 輅妙盡時華始備偽氏復設充庭之制永明中
 更增藻飾盛於前矣案周禮以檢漢志名器不
 同晉宋改革稍與世異今記時事而已

玉輅

漢金根也

漆畫輪

金塗縱容後路受福輅

兩廂上望板前

優遊

通綠金塗鏤鏤碧以八刺鑿鏤金薄帖兩廂外織成衣兩廂裏上施金塗鏤面釘璫瑁

帖望板廂上

金薄帖金博可山登仙紐松精優遊上和鸞鳥立花跌街鈴銀帶瑁筒瓦金塗鏤

鏤刀格織成手

匠金花細錦衣優遊下隱膝裏施金塗鏤面釘織成文優遊橫前施瑁瑁帖金

塗花釘優遊前

金塗倒龍後拍鑿銀瑁瑁龜甲金塗花杏望板金塗受福望龍諸校飾輓及諸

末皆螭

龍形板在車前銀帶花獸金塗受福緣

龍首

裏邊鏤鏤瑁瑁織成衣裏金塗

鏤面花釘外

金塗博山辟斗蓋金塗鏤鏤二十

邪虎鳳皇街

花諸校飾斗蓋八瓜支子花黃

錦斗衣復碧綃

染布綠油頂絳系終織成顏苞

藉舌孔雀毛

復錦綠絞隨陰懸珠蚌佩金塗鈴

雲朱結仙人綬

一轅漆畫車衡銀花帶衡上金

雜色真孔雀

毳一轅漆畫車衡銀花帶衡上金

鳥立花跌街鈴

所謂鸞鳥立衡也又龍首街輓

義髦插翟尾

上下花杏絳綠系的望繩八枚

萬曆十七年刊

旂十二旂

畫升龍竿首金塗龍銜火燄幡真毼

檠戟

織成衣金塗沓駐及受福

金塗鴈

漆案立牀

在車中錦複黃紋為案立衣

錦複黃紋障

泥

八幅長九尺緣紅錦

五輅江左相承駕四馬左右駢為六施絳絲游

御繩其重轂貳轄飛軫幡

用赤油金有紫真毼

左纛

置左駢馬

輓金鏤

金加冠狀如三方

方釳

鐵廣數寸有三孔插翟尾其中繫

金塗紫皮紫真

鏤錫

刻金為馬面當顙

皆如古制世

祖永明初加玉輅為重蓋又作麒麟頭采畫以

馬首戴之竟陵王子良啓曰臣聞車旗有章載

自前史器必依禮服無舛法凡蓋負象天軫方

法地上無二天之儀下設兩蓋之飾求之志錄

恐為乖表又假為麟首加乎馬頭事不師古鮮

或可施建武中明帝乃省重蓋等

金輅

制度校飾如玉輅而稍減少亦以金塗

象輅

如金輅而制飾又減

木輅

制飾如象輅而尤減

革輅

如木輅

建大麾

赤旗也首施火燄幡

宋昇明三年錫齊王大輅戎輅各一乘黃五輅

無大輅戎輅左丞王遂之議大輅殷之祭車故
不登周輅之名而明堂位云大輅殷輅也注云
大輅木輅也月令中央土乘大輅注云殷輅也
禮器大輅繁纓一就注云大輅殷之祭天車也
周禮五路玉路金路象路革路木路則周之木
輅殷之大輅也周革路建大白以卽戎此則戎
輅也意謂國之大事在祀與戎故錫以殷祭天
之車與周之即戎之路祀則以殷戎必以周者
明郊天義遠建前代之禮即戎事近故以今世

之制明堂位云魯君孟春乘大路載十有二旒
日月之章祀于帝郊天子以大輅以錫諸侯良
有以也今木路即大路也太尉左長史王儉議
宜用金輅九旒時乘黃無副借用五輅大朝臨
軒權列三輅

玉金輅建碧旂象木輅建赤旂永明初太子步
兵校尉伏曼容議以爲齊德尚青五路五牛及
五色幡旗竝宜以先青爲次軍容戎事之所乘
犧牲繭握之所薦竝宜悉依尚色三代服色以

姓音爲尚漢不識音故還尚其行運之色今既無善律則大齊所尚亦宜依漢道若有善吹律者便應還取姓尚太子僕周顥議三代姓音古無前記載音配尚起自曼容則是曼容善識姓聲不復旁假吹律何故能識遠代之宮商而更迷皇朝之律呂而云當今無知吹律以定所尚宜附漢以從闕邪皇朝今以行運爲所尚非關不定於音氏如此設有善律之知音不宜遵聲以爲尚散騎常侍劉朗之等十五人竝議駁之

事不行

皇太子象輅

校飾如御旂九旒降龍

皇太后皇后重翟車

金塗校具白地人馬錦帖相隱膝後戶白牙的帖金

塗面釘漆畫輪鐵鎗金塗縱容後路轆師子轄抗檐皆施金塗螭頭及神龍雀等諸飾軛衡上施金博山又有蓋金塗瓜支子花二十八青油金塗長角巴首蓋俠碧絹黃絞蓋漆布裏紫顏芎黃絞隨陰碧毛碧旂九旒棨戟宋元嘉東宮外上施絳紫系絛

儀記云中宮僕御重翟金根車未詳得稱爲金根也

皇太子妃厭翟車

如重翟飾微減

指南車

四周廂上施屋指南人衣裳襦天衣在廂中上四角皆施龍子竿縣雜色真孔

雀耗烏布阜複慢漆畫輪駕牛皆銅校飾

記里鼓車

制如指南上施華蓋子襟衣漆畫鼓機皆在內

輦車

如犢車竹蓬廂外鑿鏤金薄碧紗衣織成

瑋瑁帖金塗松精登仙花紐綠四緣四望紗萌子上下前後眉鏤鏤轆枕長角龍白牙蘭瑋瑁

金塗校飾漆郭塵板在蘭前金銀花獸攫天龍師子鏤面榆花細指子摩尼炎金龍虎扶轆銀

口帶龍板頭龍轆輓上金鳳皇鈴璪錄口帶星後梢瑋瑁帖金塗香沓銀星花獸慢竿杖金塗

龍率縱橫長襖背花香染井牀副自輦以下二官御車皆綠油幢絳系絡御所乘雙棟其公主

則碧油司馬法曰夏后氏輦曰金車殷曰胡奴

車周曰輜車皆輦也漢書叔孫通傳云皇帝輦

出房成帝輦過後宮此朝宴並用也輿服志云

輦車具金銀丹青采矐雕畫蒲陶之文乘人以

行信陽侯陰就見井丹左右人進輦是為臣下

亦得乘之晉武帝給安平獻王孚雲母輦晉中

朝又有香衣輦江左唯御所乘

卧輦

校飾如坐輦不甚服用

漆畫輪車

金塗校飾如輦微有減降金塗鑄縱容後輓師子副也

御為羣

公舉哀臨哭所乘皇后太子妃亦乘之

漆畫牽車

小形如輿車金塗縱容後路師子輓鐵鑄錦衣箱裏隱膝後戶牙蘭轅枕

稍憶竿代棟梁皆金塗校飾

御及皇太子所乘即古之羊車

也晉泰始中中護軍羊琇乘羊車為司隸校尉

劉毅所奏武帝詔曰羊車雖無制非素者所服

免官衛玠傳云摠角乘羊車市人聚觀今不駕

羊猶呼牽此車者為羊車云

輿車

形如輶車七畫金校飾錦衣兩廂後戶隱膝牙蘭皆瑋瑁帖刀格鏤面花釘憶竿成

校棟梁下施八欄金一曰小輿小行幸乘之皇

太子亦得於宮內乘之

衣畫十二乘

檜榆轂輪篋子壁綠油衣廂外絲紗萌油幢絡通憶竿刺代棟梁拙

孺真形龍牽支子花轆後伏神執承泥杏金塗校具

古副車之象也今亦

曰五時副車

青萌車是謂榆憶車

油絡畫安車公主王妃三公特進夫人所乘漢

制皇后貴人紫罽駟車晉皇后乘雲母油畫安

車駕六以兩轅安車駕五為副公主畫安車駕

六以兩轅安車駕三為副公主畫安車駕三三

夫人青交絡安車駕二皆以紫絳罽駟車駕三

爲副九嬪世婦駟車駕二王公妃特進夫人阜
交絡爲副漢賤輶車而貴駟車晉賤輶駟而貴
輶車皆行禮所乘

黃屋車建碧旂九旒

九旒鸞輅也漢輿服志云金根車蓋黃繒爲裏謂之

黃屋今金玉輅皆以黃地錦唯此車以黃繒皆金塗校具黃隱隨陰青毛羽二十八瓜支子花

絳系九命上公所乘

青蓋安車朱幡漆班輪駕一左右駢通憶車爲
副諸王禮行所乘凡車有幡者謂之軒阜蓋安
車朱幡漆班輪駕一通憶牛車爲副三公禮行

所乘

安車黑耳阜蓋馬車朱幡駕一牛車爲副國公
列侯禮行所乘

馬車駕一九卿領護二衛驍游四軍五校從郊
陵所乘晉制三公下至九卿又各安車黑耳一
乘公駕三特進駕二卿駕一復各輶車施黑耳
後戶阜輪一乘

油絡輶車尚書令僕射中書監令尚書侍中常
侍中黃門中書散騎侍郎皆駕一牛朝直所乘

晉制尚書令施黑耳後戶阜輪僕射中書監令直施後戶阜輪尚書無後戶皆漆輪轂今猶然安車赤屏駕一又輅車施後戶為副太子二傅禮行所乘

四望車

通憶油幢絡班漆輪轂

亦曰阜輪以加禮貴臣晉

武詔給魏舒陽燧四望小車

三望車

制度如四望

或謂之夾望亦以加禮貴臣次

四望

油幢絡車

制似三望而減

王公加禮者之常乘次三

望平乘車

竹箕子壁仰揜榆為輪通憶竿刺代棟梁拙樨真形龍牽金塗支子花紐

轅頭後稍沓伏神承泥庶人亦然但不通憶

三公諸王所乘自四望

至平乘皆銅校飾

輶輅車

四輪飾如金根四角龍首施組銜壁垂五采析羽葆流蘇前後雲氣錯畫帷裳

以素為地而黼黻駕四白駱馬太僕執轡貴臣薨亦如之羽飾駕御微有減降

虞書曰予欲觀古人之象日月星辰山龍華蟲

作績宗彝藻火粉米黼黻絺繡以五采章施于

五色天子服備日月以下公山龍以下侯伯華

蟲以下子男藻火以下卿大夫粉米以下天子

六冕王后六服著在周官公侯以下咸有名則佩玉組綬竝具禮文後代沿革見漢志晉服制令其冠十三品見蔡邕獨斷竝不復具詳宋明帝太始四年更制五輅議脩五冕朝會饗獵各有所服事見宋注舊相承三公以下冕七旒青玉珠卿大夫以下五旒黑玉珠永明六年太常丞何譔之議案周禮命數改三公八旒卿六旒尚書令王儉議依漢三公服山龍九章卿華蟲七章從之

平冕黑介幘今謂平天冠皐表朱綠裏廣七尺長尺二寸垂珠十二旒以朱組爲纓如其綬色衣皐上絳下裳前三幅後四幅衣畫而裳繡爲日月星辰山龍華蟲藻火粉米黼黻十二章素帶廣四寸朱裏以朱綠裨飾其側要中以朱垂以綠垂三尺中衣以絳緣其領袖赤皮鞞絳袴袂赤舄郊廟臨朝所服也漢世冕用白玉珠爲旒魏明帝好婦人飾改以珊瑚珠晉初仍舊後乃改江左以美玉難得遂用琇珠世謂之白琬

珠

袞衣漢世出陳留襄邑所織宋末用繡及織成
建武中明帝以織成重乃采畫爲之加飾金銀
薄世亦謂爲天衣

史臣曰黼黻之設經緯爲用故五色六章十二
衣還相爲質也歷代龍袞織以成文今體不勝
衣變易舊法豈致美黻冕之謂乎

通天冠黑介幘金博山顏絳紗袍皂緣中衣乘
輿常朝所服舊用駮犀簪導東昏改用玉其朝

服臣下皆同

黑介幘單衣無定色乘輿拜陵所服其白恰單
衣謂之素服以舉哀臨喪

遠游冠太子諸王所冠太子朱纓翠羽綏珠節
諸王玄纓公侯皆同

平冕各以組爲纓王公八旒衣山龍九章卿七
旒衣華蟲七章竝助祭所服皆畫阜絳繒爲之
進賢冠諸開國公侯鄉亭侯卿大夫尚書關內
侯二千石博士中書郎丞郎祕書監丞郎太子

中舍人洗馬舍人諸府長史卿尹丞下至六百石令長小吏以三梁二梁一梁為差事見晉令武冠侍臣加貂蟬餘軍校武職黃門散騎太子中庶子二率朝散都尉皆冠之唯武騎虎賁服文又插雉尾於武冠上

史臣曰應劭漢官釋附蟬及司馬彪志竝不見侍中與常侍有異唯言左右珥貂而已案項氏說云漢侍中蟬刻為蟬像常侍但為瑠而不蟬未詳何代所改也

法冠廷尉等諸執法者冠之

高山冠謁者冠之

樊噲冠殿門衛士冠之

黑介幘冠文冠平幘冠武冠尚書令僕射尚書

納言幘後飾為異

童子空頂幘施假髻貴賤同服

救日蝕文武官皆免冠著赤介幘對朝服赤幘

示威武也

袴褶車駕親戎中外纂嚴所服黑冠帽綴紫襍

以絡帶代鞶帶中官紫襍外官絳襍其纂嚴戎服不綴襍行留悉同校獵巡幸從官戎服鞶帶鞶帶文官不纓武官脫冠

袿襪大衣謂之禕衣皇后謁廟所服公主會見大首髻其燕服則施嚴雜寶爲佩瑞袿襪用繡爲衣裳加五色鑲金銀校飾

綬乘輿黃赤綬黃赤纁綠紺五采太子朱綬諸王纁朱綬皆赤黃纁紺四采色亦同相國綠紱綬三采綠紫紺郡公玄朱侯伯青朱子男素朱

皆三采公世子紫侯世子青鄉亭關內侯墨綬皆二采郡國太守內史青尚書令僕中書監令祕書監皆黑丞皆黃諸府丞亦黃皇后與乘輿同赤貴嬪夫人貴人紫王太妃長公主封君亦紫綬六官郡公侯夫人青綬

乘輿傳國璽秦璽也晉中原亂沒胡江左初無之北方人呼晉家爲白板天子冉閔敗璽還南別有行信等六璽皆金爲之亦秦漢之制也皇后金璽太子諸王金璽皆龜鈕公侯五等金章

公世子金印侯銀印貴嬪夫人金章公主王太
妃封君金印六宮以下公侯太夫人夫人銀印
其公將軍金章光祿大夫卿尹太子傅諸領護
將軍中郎將校書郡國太守內史四品五品將
軍皆銀章尚書令僕中書監令祕書丞太子二
率諸府長史卿尹丞尉中丞都水使者諸州刺
史皆銅印
三臺五省二品文官皆簪白筆王公五等及武
官不簪加內侍乃簪

百官執手板尚書令僕尚書手板頭復有白筆
以紫皮裹之名曰笏漢末仲長統謂百司皆宜
執之其肩上紫袷囊名曰契囊世呼爲紫荷
佩玉自乘輿以下與晉宋制同建元四年制王
公侯卿尹珠水精其餘用牙蚌太官宰人服離
支衣後定

贊曰文物煌煌儀品穆穆分別禮數莫過輿服

南齊書卷九
漆畫牽車注戍棟梁一本戍作戈輿車注戍校棟梁一本戍校作戈杖衣畫車注刺代棟梁平乘車注刺代棟梁竝疑

志第九

志第十

南齊書十八

祥瑞

臣蕭子顯撰

天符瑞命遐哉邈矣靈篇祕圖固以蘊金匱而充石室炳契決陳緯候者方策未書啓覺天人
之期扶獎帝王之運三五聖業神明大寶二謀
協贊罔不由茲夫流火赤雀實紀周祚雕雲素
靈發祥漢氏光武中興皇符爲盛魏膺當塗之
讖晉有石瑞之文史筆所詳亦唯舊矣齊氏受

命事殷前典黃門郎蘇偁撰聖皇瑞應記永明
中庾溫撰瑞應圖其餘衆品史注所載今詳錄
去取以爲志云

老子河洛讖曰年曆七七水滅緒風雲俱起龍
鱗舉宋水德王義熙十四年元熙二年永初三
年景平一年元嘉三十年孝建三年大明八年
永光一年泰始七年泰豫元年元徽四年昇明
三年凡七十七年故曰七七也易曰雲從龍風
從虎關尹云龍不知其乘風雲而上天也

讖又曰蕭草成道德懷書備出身形法治吳出
南京上即姓諱也南京南徐州治京口也

讖又曰墮塌河梁塞龍淵消除水災泄山川墮
塌河梁爲路也路即道也淵塞者譬路成也即
太祖諱也消水災言除宋氏患難也

讖又曰上參南斗第一星下立草屋爲紫庭神
龍之岡梧桐生鳳鳥舒翼翔且鳴南斗第一星
吳分也草屋蕭字也又簫管之器像鳳鳥翼也
讖又曰蕭爲二士天下大樂二士主字也

識又曰天子何在草中宿宿肅也
尚書中候儀明篇曰仁人傑出握表之象曰角
姓合音之于蘇偁云蕭角姓也又八音之器有
簫管也

皮臣曰案晉光祿大夫何禎解音之于爲曹字
謂魏氏也王隱晉書云卯金音于亦爲魏也侯
書章句本無銓序二家所稱既有前釋未詳偁
言爲何推據

孝經鉤命決曰誰者起視名將君者羣也理物
爲雄優劣相次以期興將太祖小諱也征西將
軍蕭思話見之曰此我家諱也

王子年歌曰金刀治世後遂苦帝王昏亂天神
怒災異屢見戒人主三分二叛失州土三王九
江一在吳餘悉稚小早少孤一國二主天所驅
金刀劉也三分二叛宋明帝世也三王九江者
孝武於九江興晉安王子勛雖不終亦稱大號
後世祖又於九江基霸迹此三王也一在吳謂
齊氏桑梓亦寄治南吳也一國二主謂太祖符

運潛興為宋氏驅除寇難

歌又曰三禾摻摻林茂華金刀利刃齊刈之刈
翦也詩云實始翦商

歌又曰欲知其姓草肅肅穀中最細低頭熟鱗
身甲體永興福穀道熟成又諱也太祖體有龍
鱗斑駁成文始謂是黑歷治之甚至而文愈明
伏羲亦鱗身也

金雄記曰鑠金作刀在龍里占睡上人相須起
又云當復有作肅入草蕭字也易云聖人作之

記又云草門可憐乃當悴建號不成易運沸詩
云不時時也不成成也建號建元號也易運革
命也

識曰周文王受命千五百歲河雒出聖人受命
於巳未至丙子為十八周旅布六郡東南隅四
國安定可久留案周滅殷後七百八十年秦四
十九年漢四百二十五年魏四十五年晉百五
十年宋六十年至建元元年千五百九年也武
進縣彭山舊坐在此其山岡阜相屬數百里上

古齊志卷十
有五色雲氣有龍出焉宋明帝惡之遣相墓工
高靈文占視靈文先與世祖善還詭答云不過
方伯退謂世祖曰貴不可言帝意不已遣人於
墓左右校獵以大鐵釘長五六尺釘墓四維以
爲厭勝太祖後改樹表柱柱忽龍鳴響震山谷
父老咸志之云會稽剡縣刻石山相傳爲名不
知文字所在昇明末縣民兒襲祖行獵忽見石
上有文凡三處苔生其上字不可識刊苔去之
大石文曰此齊者黃公之化氣也立石文曰黃

天星姓蕭字某甲得賢帥天下太平小石文曰
刻石者誰會稽南山李斯刻秦望之封也
益州齊后山父老相傳其名亦不知所起昇明
三年有沙門玄暢於山丘立精舍其日太祖受
禪日也

嵩高山昇明三年四月滎陽人尹午於山東南
隅見天雨石墜地石開有璽在其中方三寸其
文曰戊丁之人與道俱肅然入草應天符又曰
皇帝興運午奉璽詣雍州刺史蕭赤斧赤斧表

獻之

史臣案昔大人見臨洮而銅人鑄臨洮生董卓而銅人毀有卓而世亂世亂而卓亡如有似也晉末嵩高山出玉璧三十二宋氏以爲受命之祥今此山出璽而水德云謝終始之徵亦有領也元徽四年太祖從南郊望氣者陳安寶見太祖身上黃紫氣屬天安寶謂親人王洪範曰我少來未嘗見軍上有如此氣也太祖年十七夢乘青龍西行逐日日將薄山乃止覺而恐懼家人

問占者云至貴之象也蘇偁云青木色日暮者宋氏未運也

泰始七年明帝遣前淮南太守孫奉伯往淮陰監元會奉伯與太祖同寢夢上乘龍上天於下捉龍脚不得覺謂太祖曰兗州當大庇生民弟不見也奉伯卒於宋

清河崔靈運爲上府參軍夢天帝謂已曰蕭諱是我弟十九子我去年已授其天子位自三皇五帝至齊受命君凡十九人也

宋泰始中童謠云東城出天子故明帝殺建安
王休仁蘇侃云後順帝自東城即位論者謂應
之乃是武進縣上所居東城里也熊襄云上舊
鄉有大道相傳云秦始皇所經呼爲天子路後
遂爲帝鄉焉案順帝實當援立猶如晉之懷愍
亦有徵符齊運旣無巡幸路名或是秦舊疑不
能詳

世祖年十三夢舉體生毛髮生至足又夢人指
上所踐地曰周文王之田又夢虛空中飛又夢
著孔雀羽衣庾温云雀爵位也又夢鳳皇從天
飛下青溪宅齋前兩翅相去十餘丈翼下有紫
雲氣及在襄陽夢著棗屐行度太極殿階庾温
云屐者運應木也臣案棗字爲四十而二點世
祖年過此即帝位謂著屐爲木行也屐有兩齒
有聲是爲明兩之齒至四十二而行即真矣及
在郢州夢人從天飛下頭插筆來畫上衣兩邊
不言而去庾温釋云畫者山龍華蟲也
世祖宋元嘉十七年六月己未夜生無火婢吹

南齊志卷十
七
灰而火自燃

世祖於南康郡內作伎有絃無管於是空中有篪聲調節相應

世祖爲廣興相嶺下積旱水涸不通船上部伍至水忽暴長庾溫云易利涉大川之義也

世祖頓盆城城內無水欲鑿引江流試掘井得伏泉九處皆湧出建元元年四月有司奏延陵令戴景度稱所領季子廟舊有涌井二所廟祝列云舊井北忽聞金石聲即掘深三尺得沸泉

其東忽有聲錚錚又掘得泉沸湧若浪泉中得一銀木簡長一尺廣二寸隱起文曰廬山道人張陵再拜謁詣起居簡木堅白而字色黃謹案瑞應圖浪井不鑿自成王者清靜則仙人主之孔氏世錄云叶精帝道孔書明巧當在張陵宋均注云張陵佐封禪一云陵仙人也元徽三年太祖在清溪宅齋前池中忽揚波起浪湧水如山有金石響須臾有青龍從池中出左右皆見之

昇明元年青龍見齊郡

建元四年青龍見順陽郡清水縣平泉湖中
永明七年黃龍見曲江縣黃池中一宿二日
中興二年山上雲障四塞頃有玄黃五色如龍
長十餘丈從西北升天

宋泰始末武進舊塋有獸見一角羊頭龍翼馬
足父老咸見莫之識也

永明十年鄱陽郡獻一角獸麟首鹿形龍鸞共
色瑞應圖云天子萬福允集則一角獸至

十一年白象九頭見武昌

史臣日記云升中于天麟鳳至而龜龍格則鳳
皇巢乎阿閣麒麟在乎郊數豈非馴之在庭擾
以成畜其爲瑞也如此今觀魏晉已來世稱靈
物不少而亂多治少史不絕書故知來儀在沼
遠非前事見而不至未辨其爲祥也

昇明三年三月白虎見歷陽龍亢縣新昌村新
昌村嘉名也瑞應圖云王者不暴白虎仁
建元四年三月白虎見安蠻虔化縣

中興二年二月白虎見東平壽張安樂村

昇明二年騶虞見安東縣五界山師子頭虎身龍脚詩傳云騶虞義獸白虎黑文不食生物至德則出

昇明三年太祖爲齊王白毛龜見東府城池中
建元二年休安陵獲玄龜一頭

永明五年武騎常侍唐潛上青毛神龜一頭

七年六月彭城郡田中獲青毛龜一頭

八年延陵縣前澤畔獲毫龜一枚

八年四月長山縣三惠獲六目龜一頭腹下有萬歡字并有卦兆

六月建城縣昌城田獲四目龜一頭下有萬齊字

九年五月長山縣獲神龜一頭腹下有巽兌卦
中興二年正月邏將潘道蓋於山石穴中獲毛龜一頭

昇明三年世祖遣人詣宮亭湖廂還福船泊渚有白魚雙躍入船

永明五年南豫州刺史建安王子真表獻金色魚一頭

建元元年八月男子王約獲白雀一頭

九月秣陵縣獲白雀一頭

二年四月白雀集郢州府館

五月白雀見會稽永興縣

永明元年五月郢州丁坡屯獲白雀一頭

三年七月安城王暕第獲白雀一頭

九月南郡江陵縣獲白雀一頭

四月七日白雀見臨汝縣

七年六月鹽官縣獲白雀一頭

八年天門臨澧縣獲白雀一頭

九年七月吳郡錢塘縣獲白雀一頭

八月豫州獲白雀一頭

十年五月齊郡獲白雀一頭

建元元年五月白鳥見巴郡

永明四年三月三足鳥巢南安中陶縣庭

八年四月陽羨縣獲白鳥一頭

隆昌元年四月陽羨縣獲白鳥一頭

建元二年江陵縣獲白鼠一頭

永明六年白鼠見芳林園

十年九月義陽郡獲白鼠一頭

永明四年丹楊縣獲白兔一頭

昇明元年六月慶雲見益都

建元元年世祖拜皇太子日有慶雲在日邊

三年華林園醴泉堂東忽有瑞雲周圍十許丈

高下與景雲樓平五色藻密光彩映山徘徊良

久行轉南行過長船入華池

昇明二年宣城臨成縣於藉山獲紫芝一枝

永明八年五月陽城縣獲紫芝一株

隆昌元年正月襄陽縣獲紫芝一莖

昇明二年四月昌國縣徐萬年門下棠樹連理

九月豫州萬歲澗廣數丈有樹連理隔澗騰枝

相通越壑跨水爲一榦

建元二年九月有司奏上虞縣楓樹連理兩根
相去九尺雙株均聳去地九尺合成一榦

故鄆縣楓樹連理兩株相去七尺大八圍去地一丈仍相合爲樹泐如一木

山陽縣界若邪村有一槻木合爲連理

淮陰縣建業寺梨樹連理

建康縣梨樹耀攘一本作耀攘五圍連理六枝

永明元年五月木連理生安成新喻縣又生南

梁陳縣閏月璿明殿外閣南槐樹連理

八月鹽官縣內樂村木連理

二年七月烏程縣陳文則家槿樹連理

七月新冶縣槐栗二木合生異根連理去地數尺中央小開上復爲一

三年正月安城縣榆樹二株連理

二月安陽縣梓樹連理

九月句陽縣之穀山槿樹連理異根雙挺共杪爲一

十二月永寧左郡楠木連理

四年二月秣陵縣高天明園中李樹連理生高三尺五寸兩枝別生復高三尺合爲一榦

五年正月秣陵縣華僧秀園中四樹連理

六年四月江寧縣北界賴鄉齊平里三成羅門外路東太常蕭惠基園榎樹二株連理其高相去二尺南大北小小者傾柯南附合爲一樹枝葉繁茂圓密如蓋

七年江寧縣李樹二株連理兩根相去一丈五尺

八年巴陵郡樹連理四株

三月武陵白沙戍槻木連理相去五尺俱高三

尺東西二枝合而通柯

十二月柴桑縣陶委天家樹連理

永明五年山陰縣孔廣家園榿樹十二層會稽太守隨王子隆獻之種芳林園鳳光殿西

九年秣陵縣鬪場里安明寺有古樹衆僧改架屋宇伐以爲薪剖樹木裏自然有法大德三字始興郡本無欂樹調味有闕世祖在郡堂屋後忽生一株

昇明二年十月甘露降建康縣

十一月甘露降長山縣

十二月甘露降彭山松樹至九日止

建元元年九月甘露降淮南郡桃石榴二樹有

司奏甘露降新汲縣王安世園樹

永明二年四月甘露降南郡桐樹

四年二月甘露降臨湘縣李樹

三月甘露降南郡桐樹

四月甘露降睢陽縣桃樹

五年四月甘露降荊州府中閣外桐樹

六年甘露降芳林園故山堂桐樹

九年八月甘露降上定林寺佛堂庭中天如雨

遍地如雪其氣芳其味甘耀日舞風至晡乃止

爾後頻降鍾山松樹四十餘日乃止

十月甘露降大安陵樹

中興二年三月甘露降茅山彌漫數里

元徽四年三月醴泉出昌國白鹿山其味甚甘

永明元年正月新蔡郡固始縣獲嘉禾一莖五

穗

八月新蔡縣獲嘉禾二莖九穗一莖七穗
十一月固始縣獲嘉禾一莖九穗

二年八月梁郡睢陽縣界野田中獲嘉禾一莖
二十三穗

五年九月莒縣獲嘉禾一株

十年六月海陵齊昌縣獲嘉禾一莖六穗

十一年九月睢陽縣田中獲嘉禾一株

昇明二年九月建寧縣建昌村民採藥於萬歲
山忽聞澗中有異響得銅鍾一枚長二尺一寸

邊有古字

建元元年十月浩陵郡蠶民田健所住巖間常
留雲氣有聲響澈若龍吟求之積歲莫有見者
去四月二十七日巖數里夜忽有雙光至明往
獲古鍾一枚又有一器名淳于蠶人以爲神物
奉祠之

永明四年四月東昌縣山自比歲以來恒發異
響去二月十五日有一巖褫落縣民方元泰往
視於巖下得古鍾一枚

五年三月豫寧縣長岡山獲神鍾一枚

九年十一月寧蜀廣漢縣田所墾地八尺四寸獲古鍾一枚形高三尺八寸圍四尺七寸縣柄長一尺二寸合高五尺四面各九孔更於陶所瓦間見有白光窺尋無物自後夜夜輒復有光既經旬日村民張慶宣瓦作屋又於屋間見光照內外慶宣疑之以告孔休先乃共發視獲玉璽一鈕壁方八分上有鼻文曰帝真曲阿縣民黃慶宅左有園園東南廣袤四丈每種菜輒鮮

異雖加採拔隨復更生夜中恒有白光皎質屬天狀似縣絹私疑非常請師卜候道士傅德占使掘之深三尺獲玉印一鈕文曰長承萬福永明二年正月冠軍將軍周普孫於石頭北廂將堂見地有異光照城堞往獲玉璽一鈕方七分文曰明玄君

十一月虜國民齊祥歸入靈丘關聞殷然有聲仰視之見山側有紫氣如雲衆鳥回翔其間祥往氣所獲璽方寸四分獸鈕文曰坤維聖帝永

昌送與虜太后師道人惠度欲獻虜主惠度覩其文竊謂當今衣冠正朔在於齊國遂附道人惠藏送京師因羽林監崔士亮獻之

三年七月始興郡民龔玄宣云去年二月忽有一道人乞食因探懷中出篆書真經一卷六紙又表北極一紙又移付羅漢居士一紙云從兜率天宮下使送上天子因失道人所在今年正月玄宣又稱神人授皇帝璽龜形長五寸廣二寸厚二寸五分上有天地字中央蕭字下萬世

字十年蘭陵民齊伯生於六合山獲金璽一鈕文曰年予主

世祖治益城得五尺刀一十口永明年曆之數昇明三年左里村人於宮亭湖得鞞戟二枚傍有古字文遠不可識

泰始中世祖於青溪宅得錢一枚文有北斗七星雙節又有人形帶劔及治益城又得一大錢文曰太平百歲

永明七年齊興太守劉元寶治郡城於塹中獲

錢百萬形極大以獻臺爲瑞世祖班賜朝臣以下各有差

十年齊安郡民王攝掘地得四文大錢一萬二千七百十枚品製如一

建元元年郢州監利縣天井湖水色忽澄清出綿百姓採以爲績

永明二年護軍府門外桑樹一株竝有蠶絲綿被枝莖

史臣案漢光武時有野蠶成繭百姓得以成衣

服今則浮波幕樹其亦此之類乎

永明八年始興郡昌樂村獲白鳩一頭

二年彭澤縣獲白雉一頭

七年鬱林獲白雉一頭

十年青州涇液戍獲白雉一頭

五年望蔡縣獲白鹿一頭

九年臨湘獲白鹿一頭

六年蒲儔縣亮野村獲白麀一頭

七年荊州獲白麀一頭

八年餘干縣獲白麀一頭

九年義陽安昌縣獲白麀一頭

十年司州清激戍獲白麀一頭

十一年廣陵海陵縣獲白麀一頭

七年越州獻白珠自然作思惟佛像長三寸上起禪靈寺置刹下

七年吳郡太守江敷於錢塘縣獲蒼玉璧一枚以獻

七年主書朱靈讓於浙江得靈石十人舉乃起

在水深三尺而浮世祖親投于天淵池試之刻爲佛像

二年順陽丹水縣山下得古鼎一枚

三年越州南高涼俚人海中網魚獲銅獸一頭銘曰作寶鼎齊臣萬年子孫承寶

贊曰天降地出星見先吉造物百品詳之載述

志第十一

南齊書十九

臣蕭子顯撰

五行

木傳曰東方易經地上之木為觀故木於人威儀容貌也木者春生氣之始農之本也無奪農時使民歲不過三日行什一之稅無貪欲之謀則木氣從如人君失威儀逆木行田獵馳騁不反宮室飲食沈湎不顧禮制出入無度多發繇役以奪民時作為姦詐以奪民財則木失其性

矣蓋以工匠之爲輪矢者多傷敗故曰木不曲
直宋泰豫元年京師祗垣寺阜莢樹枯死昇明
末忽更生花葉京房易傳曰樹枯冬生不出二
年國喪君子亡其占同宋氏禪位

建元元年朱爵斲華表柱生枝葉

建元初李子生毛

二年武陵沅頭都尉治有桑樹方冬生葉京房
易傳曰木冬生花天下有喪其占同後二年宮
車晏駕

四年巴州城西古樓脚栢柱數百年忽生華

永明六年石子岡栢木長二尺四寸廣四寸半

化爲石時車駕數游幸應本傳木失其性也

永明中大斲一船無故自沈艚中無水

隆昌元年廬陵王子卿齋屋梁柱際無故出血

建武初始安王遙光治廟截東安寺屋以直廟

垣截梁水出如淚

貌傳曰失威儀之制怠慢驕恣謂之狂則不肅
矣下不敬則上無威天下旣不敬又肆其驕恣

肆之則不從夫不敬其君不從其政則陰氣勝故曰厥罰常雨

永明八年四月己巳起陰雨晝或暫晴夜時見星月連雨積霖至十七日乃止

十一年四月辛巳朔至三月戊寅起而其間暫時晴從四月一日又陰雨晝或見日夜乍見月回復陰雨至七月乃止

永泰元年十二月二十九日雨至永元元年五月二十一日乃晴京房易曰冬雨天天下饑春雨

有小兵時虜寇雍州餘應本傳

傳曰大雨雪猶庶徵之常雨也然有甚焉雨陰大雨雪者陰之畜積甚也一曰與大水同象曰攻爲雪耳

建元二年閏月己丑雨雪

三年十一月雨雪或陰或晦八十餘日至四年二月乃止

傳曰雷於天地爲長子以其首長萬物與之出入故雷出萬物出雷入萬物入夫雷者人君之

象入則除害出則興利雷之微氣以正月出其
有聲者以二月出以八月入其餘微者以九月
入冬三月雷無出者若是陽不閉陰則出涉危
難而害萬物也

建元元年十月壬午夜電光因雷鳴

十月庚戌電光有頃雷鳴久而止

永明五年正月戊申夜西北雷聲

六年十月甲申夜陰細雨始聞雷鳴於西北上

七年正月甲子夜陰雷鳴西南坤宮隆隆一聲

而止

八年正月庚戌夜雷起坎宮水門其音隆隆一
聲而止

九年二月丙子西北有電光因聞雷聲隆隆仍
續十聲而止

十年二月庚戌夜南方有電光因聞雷聲隆隆
相續丁亥止

十月庚子電雷起西北

十一月丁丑西南有光因聞雷聲隱隱再聲而

止西南坤宮

十二月甲申陰雨有電光因聞西南及西北上雷鳴頻續三聲

丙申夜聞西北上雷頻續二聲

辛亥雷雨

傳曰雨雹君臣之象也陽之氣專爲雹陰之氣專爲霰陽專而陰脅之陰盛而陽薄之雹者陰薄陽之象也霰者陽脅陰之符也春秋不書霰者猶月蝕也

建元四年五月戊午朔雹

永明元年九月乙丑雹落大如蒜子須臾乃止十一年四月辛亥雹落大如蒜子須臾滅

貌傳又曰上失節而狂下怠慢而不敬上下失道輕法侵制不顧君上因以荐飢貌氣毀故有雞旣一曰水歲雞多死及爲怪亦是也上下不相信大臣姦宄民爲寇盜故曰厥極惡一曰民多被刑或形貌醜惡風俗狂慢變節易度則爲輕剽竒怪之服故曰時則有服妖

永明中宮內服用射獵錦文爲騎射兵戈之象
至建武初虜大爲寇

永明中蕭湛開博風帽後裘之製爲破後帽世
祖崩後湛建廢立誅滅諸王

永明末民間制倚勸帽及海陵廢明帝之立勸
進之事倚立可待也

建武中帽裘覆頂東昏時以爲裘應在下而今
在上不祥斷之羣下反上之象也

永元中東昏侯自造遊宴之服綴以花采錦繡
難得詳也羣小又造四種帽帽因勢爲名一曰
山鵲歸林者詩云鵲巢夫人之德東昏寵嬖淫
亂故鵲歸其林數二曰兔子度坑天意言天下
將有逐兔之事也三口反縛黃離嘍黃口小鳥
也反縛面縛之應也四曰鳳皇度三橋鳳王者
嘉瑞三橋梁王宅處也

貌傳又曰危亂端見則天地之異生木者青故
曰青眚爲惡祥凡貌傷者金沴木木沴金衝氣
相通

延興元年海陵王初立文惠太子冢上有物如人長數丈青色直上天有聲如雷

火南方揚光輝出炎爚爲明者也人君向明而治蓋取其象以知人爲分讒佞旣遠羣賢在位則爲明而火氣從矣人君疑惑棄法律不誅讒邪則讒口行內間骨肉外踈忠臣至殺世子逐功臣以妾爲妻則火失其性上災宗廟下災府榭內燬本朝外燬闕觀雖興師衆不能救也

永明三年正月甲夜西北有野火光上生精西
北有四東北有一竝長七八尺黃赤色

三月庚午丙夜北面有野火光上生精長六尺
戊夜又有一枚長五尺竝黃赤色

四年正月丁亥夜有火精三處

閏月丁巳夜有火精四所

十二月辛酉夜東南有野火精二枚

五年十二月丙寅夜西北有野火火上生精一
枚長三尺黃白色

六年十一月戊申夜西南及北三面有野火火

上生精九枚竝長二尺黃赤色

九年二月丙寅甲夜北面有野火火生精二枚西北又一枚竝長三尺須臾消

永元二年八月宮內火燒西齋璿儀殿及昭陽顯陽等殿北至華林牆西及祕閣北屋三千餘間京房易傳曰君不忠道厥妖火燒宮祕閣與春秋宣榭火同天意若曰旣無紀綱何用典文爲也

二年冬京師民間相驚云當行火災南岸人家

往往於籬間得布火纏者云公家以此禳之

三年正月豫章郡天火燒三千餘家京房易占曰天火下燒民屋是謂亂治殺兵作是年臺軍與義師偏衆相攻於南江諸郡

三年二月乾和殿西廂火燒屋三十間是時西齋旣火帝徙居東齋高宗所住殿也與燒宮占同

傳又曰犯上者不誅則草犯霜而不死或殺不以時事在殺生失柄故曰草妖也一曰草妖者

失衆之象也

永元中御刀黃文濟家齋前種昌蒲忽生花光影照壁成五采其兒見之餘人不見也少時文濟被殺

劉歆視傳有羽蟲之孽謂雞禍也班固案易雞屬巽今以羽蟲之孽類是也依歆說附視傳云建武二年有大鳥集建安形如水犢子其年郡大水

三年大鳥集東陽郡太守沈約表云鳥身備五采赤色居多案樂緯叶圖徵云焦明鳥質赤至則水之感也

永明二年四月鳥巢內殿東鳴尾
三年大鳥集會稽上虞其年縣大水
傳曰維水沴火又曰赤青赤祥

建武四年王晏子德元所居帷屏無故有血灑之少日而散晏尋被誅

思心傳曰心者土之象也思心不睿其過在瞽亂失紀風於陽則爲陰於陰則爲大臣之象專

南齊志卷十一
九
恣而氣盛故罰常風心爲五事土猶土爲五行
主也一曰陰陽相薄偏氣陽多爲風其甚也常
風陰氣多者陰而不雨其甚也常陰一曰風宵
起而晝晦以應常陰同象也

建元元年十一月庚戌風夜暴起雲雷合冥從
戌亥上來

四年十一月甲寅酉時風起小駛至二更雪落
風轉浪津

永明四年二月丙寅巳時風迅急

十一月巳丑戌時風迅急從西北戌亥上來

五年五月乙酉子時風迅急從西北戌亥上來

七年正月丁卯陽徵陰賊之日時加子風起迅
急從北方子丑上來暴疾浪津寅時止

八年六月乙酉加子時風起迅急暴疾浪津發
屋折木塵沙從西南未上來因雷雨須臾風微
雨止

九年七月甲寅陽羽廉貞之日時加亥風起迅
急從東方來暴疾彭勃浪津至乙卯陰賊時漸

微名羽動羽

九月乙丑時加未雷驟雨風起迅急暴疾浪津從西北戌上來

十月壬辰陽羽姦邪之日時加丑風起從北方子丑上來暴疾浪津迅急塵埃五日寅時漸微名羽動宮

十年正月辛巳陽商寬大之日時加寅風從西北上來暴疾浪津迅急揚沙折木酉時止

二月甲辰陽徵姦邪之日時加辰風起迅急從

西北亥上來暴疾彭勃浪津至酉時止

三月丁酉陽徵廉貞之日時加未風從北方子

丑上來迅急暴疾浪津戌時止

七月庚申陰角貪狼之日時加午風從東北丑上來迅急浪津至辛酉巳時漸微

十一年二月庚寅陽角廉貞之日時加亥風從

西北亥上來迅疾浪津丑時漸微爲角動角

七月甲寅陽羽廉貞之日時加巳風從東北寅上來迅疾浪津發屋折木戊夜漸微爲羽動徵

巳巳陽角寬大之日時加未風從戌上來暴疾
良久止爲角動商及宮

凡時無專恣疑是陰陽相薄

建昌元年三月乙酉未時風起浪津暴急從北
方上來應本傳禘亂

建武二年三年四年每秋七月八月輒大風三
吳尤甚發屋折木殺人京房占獄吏暴風害人
時帝嚴刻

永元元年七月十二日大風京師十圍樹及官

府居民屋皆拔倒應本傳

傳又曰山之於地君之象也山崩者君權損京
陵易處世將變也陵轉爲澤貴將爲賤也

建元二年夏廬陵石陽縣長溪水衝激山麓崩
長六七丈下得柱千餘口皆十圍長者一丈短
者八九尺頭題有古文字不可識江淹以問王
儉儉云江東不閑隸書此秦漢時柱也後年宮
車晏駕世變之象也

永明二年秋始興曲江縣山崩壅底溪水成陂

京房占山崩人主惡之

傳又曰雷電所擊蓋所感也皆思心有尤之所致也

建元二年閏六月丙戌戊戌夜震電

四年五月五日雲電闇都雷震于樂遊安昌殿
電火焚蕩盡

永明八年四月六日雷震會稽山陰恒山保林
寺刹上四破電火燒塔下佛面窻戶不異也

永明中雷震東宮南門無所傷毀殺食官一人

十一年三月震于東齋棟崩左右密欲治繕竟
陵王子良曰此豈可治留之志吾過且旌天之
愛我也明年子良薨

傳又曰土氣亂者木金水火亂之

建武二年二月丁巳地震

永元元年七月地日夜十八震

九月十九日地五震

金者西方萬物既成殺氣之始也其於王事兵
戎戰伐之道也王者興師動衆建立旗鼓仗旄

把鉞以誅殘賊止暴亂殺伐應義則金氣從工
冶鑄化革形成器也人君樂侵陵好攻戰貪城
邑輕百姓之命人民不安內外騷動則金失其
性蓋冶鑄不化水滯固堅故曰金不從革又曰
維木沴金

建武四年明帝出舊宮送豫章王第二女綏安
主降嬪還上輦輦上金翅無故自折落地

言傳曰言易之道西方曰允爲口人君過差無
度刑法不一歛從其重或有師旅炕陽之節若
動衆勞民是言不從人君旣失衆政令不從孤
陽持治下畏君之重刑陽氣勝則旱象至故曰
歛罰常陽也

建元三年大旱時有虜寇

永明三年大旱明年唐寓之起

建武二年大旱時虜寇方盛皆動衆之應也
言傳曰下旣悲苦君上之行又畏嚴刑而不敢
正言則必先發於歌謠歌謠口事也口氣逆則
惡言或有怪謠焉

宋泰始既失彭城江南始傳種消梨先時所無
百姓爭欲種植識者曰當有姓蕭而來者十餘
年齊受禪

元徽中童謠曰襄陽白銅鞮郎殺荊州兒後沈
攸之反雍州刺史張敬兒襲江陵殺沈攸之子
元琰等

永明元年元日有小人發白虎樽既醉與筆札
不知所道直云憶高帝敕原其罪

世祖起青溪舊宮時人反之曰舊宮者窮殿也
及上崩後宮人出居之

永明初百姓歌曰白馬向城啼欲得城邊草後
句間云陶郎來白者金色馬者兵事三年妖賊
唐寓之起言唐來勞也

世祖起禪靈寺初成百姓縱觀或曰禪者授也
靈非美名所授必不得其人後太孫立見廢也
永明中宮內坐起御食之外皆爲客食世祖以
客非家人名改呼爲別食時人以爲分別之象
少時上晏駕

文惠太子在東宮作兩頭織織詩後句云磊磊落落玉山崩自此長王宰相相繼薨徂二宮晏駕

文惠太子作七言詩後句輒云愁和諦後果有和帝禪位

永明中虜中童謠云黑水流北赤火入齊尋而京師人家忽生火赤於常火熱小微貴賤爭取以治病法以此火灸桃板七炷七日皆差敕禁之不能斷京師有病瘦者以火灸數日而差隣

人笑曰病偶自差豈火能為此人便覺願間癢明日瘦還如故後梁以火德興

文惠太子起東田時人反云後必有癩童果至太孫失位

齊宋以來民間語云擾攘建武上明帝初誅害蕃戚京師危駭

永元元年童謠曰洋洋千里流流翊東城頭烏馬烏皮袴三更相告訴脚踏不得起誤殺老姥子千里流者江柘也東城遙光也遙光夜舉事

垣歷生者烏皮袴褶狂奔之跛脚亦遙光老姥子孝字之象徐孝嗣也

永元中童謠云野豬雖嗥嗥馬子空間渠不知龍與虎飲食江南墟七九六十三廣莫人無餘烏集傳舍頭今汝得寬休但看三八後摧折景陽樓識者解云陳顯達屬豬崔慧景屬馬非也東昏侯屬豬馬子未詳梁王屬龍蕭穎胄屬虎崔慧景攻臺頓廣莫門死時年六十三烏集傳舍即所謂瞻烏爰止于誰之屋三八二十四起

建元元年至中興二年二十四年也摧折景陽樓亦高臺傾之意也言天下將去乃得休息也齊宋之際民間語云和起言以和顏而為變起也後和帝立

崔慧景圍臺城有一五色幡飛翔在雲中半日乃不見衆皆驚怪相謂曰幡者事尋當翻覆也數日而慧景敗

言傳曰言氣傷則民多口舌故有口舌之病金者白故有白青若有白為惡祥

宋昇明二年颯風起建康縣南塘里吹帛一匹入雲風止下御路紀僧真啓太祖當宋氏禪者其有匹夫居之

水北方冬藏萬物氣至陰也宗廟祭祀之象死者精神放越不反聖人爲之宗廟以收其魂氣春秋祭祀而孝子得盡禮焉敬之至則神歆之此則至陰之氣從則水氣從溝瀆隨而流去不爲民害矣人君不禱祀簡宗廟廢祭祀逆天時則霧水暴出川水逆溢壞邑軼鄉沈溺民人故

曰水不潤下

建元二年吳吳興義興三郡大水

二年夏丹楊吳二郡大水

四年大水

永明五年夏吳興義興水雨傷稼

六年吳興義興二郡大水

建武二年冬吳晉陵二郡水雨傷稼

永元元年七月濤入石頭漂殺緣淮居民應本傳荊州城內有沙池常漏水蕭穎胄爲長史水

乃不漏及穎胄亡乃復竭

傳曰極陰氣動故有魚孽魚孽者常寒罰之符也

永明九年鹽官縣石浦有海魚乘潮來水退不得去長三十餘丈黑色無鱗未死有聲如牛土人呼爲海鷲取其肉食之

永元元年四月有大魚十二頭入會稽上虞江大者近二十餘丈小者十餘丈一入山陰稱浦一入永興江皆暍岸側百姓取食之

聽傳曰不聰之象見則妖生於耳以類相動故曰有鼓妖也一曰聲屬鼓妖

永明元年十一月癸卯夜天東北有聲至戊夜傳曰皇之不極是謂不建其咎在霧亂失聽故厥咎霧思心之咎亦霧天者正萬物之始王者正萬事之始失中則害天氣類相動也天者轉於下而運於上雲者起於山而彌於天天氣動則其象應故厥罰常陰王者失中臣下盛強而蔽君明則雲陰亦衆多而蔽天光也

建元四年十月丙午日入後土霧勃勃如火煙
永明二年十一月巳亥四面土霧人人眼鼻至
辛丑止

二年十一月丙子日出後及日入後四面土霧
勃勃如火煙

六年十一月庚戌丙夜土霧竟天昏塞濃厚至
六日未時小開到甲夜後仍濃密勃勃如火煙
辛慘人人眼鼻

八年十月壬申夜土霧竟天濃厚勃勃如火煙

氣入人眼鼻至九日辰時開除

九年十月丙辰晝夜恒昏霧勃勃如火煙其氣
辛慘人人眼鼻兼日色赤黃至四日甲夜開除
十年正月辛酉酉初四面土霧勃勃如火煙其
氣辛慘人人眼鼻

傳曰易曰乾爲馬逆天氣馬多死故曰有馬禍
一曰馬者兵象也將有寇戎之事故馬爲怪

建昌四年王晏出至草市馬驚走鼓步從車而
歸十餘日晏誅

建武中南岸有一蘭馬走逐路上女子女子窘急走入人家牀下避之馬終不置發牀食女子股脚間肉都盡禁司以聞敕殺此馬是後頻有寇賊

京房易傳曰生子二曾以上民謀其主三手以上臣謀其主二口已上國見驚以兵三耳已上

是謂多聽國事無定二鼻以上國主久病三足三臂已上天下有兵其類甚多蓋以象占之

永明五年吳興東遷民吳休之家女人雙生二兒曾以下齊以上合

京房易傳曰野獸入邑其邑大虛又曰野獸無故入邑朝廷門及宮府中者邑逆且虛

永明中南海王子罕為南兖州刺史有麀入廣陵城投井而死又有象至廣陵是後刺史安陸王子敬於鎮被害

建武四年春當郊治圓丘宿設已畢夜虎攫傷人曰木谷變獸人曰木谷

建武中有鹿入景皇寢廟皆為上崩及禪代也

凡無占者皆為不應本傳
贊曰木怪夔魍火為水妃土實載物金作明威
形聲異迹影響同歸皆由象應莫不類推

志第十

南齊志十一



